

REGIONAL NEWS UNIT
ALL INDIA RADIO, AGARTALA
Date: 19-05-2024
Time: 07:55-08:05 PM Hrs
BENGALI EVENING BULLETIN

Headlines :

- (১) লোকসভা নির্বাচনের পঞ্চম দফার ভোটগ্রহণের প্রস্তুতি চূড়ান্ত ।
- (২) যথাযোগ্য মর্যাদায় পালিত মাতৃভাষা সুরক্ষা দিবস ।
- (৩) রাজ্যে বিভিন্ন বিদ্যালয়ে শুরু হল গ্রীষ্মকালীন নাট্য কর্মশালা ।
- (৪) দক্ষিণ পূর্ব মৌসুমি বায়ু প্রবাহ আজ দক্ষিণ আন্দামান সাগরে প্রবেশ করল।

Fifth Phase of Lok Sabha Election:

আগামীকাল লোকসভা নির্বাচনের পঞ্চম দফার ভোটগ্রহণের সমস্ত প্রস্তুতি চূড়ান্ত। এই পর্যায়ের ৬টি রাজ্য এবং ২টি কেন্দ্র শাসিত অঞ্চলের ৪৯টি আসনে ভোট গ্রহণ করা হবে। উত্তর প্রদেশে ১৪টি, মহারাষ্ট্রে ১৩টি, পশ্চিমবঙ্গে ৭টি, বিহার এবং উড়িষ্যায় ৫টি করে আসনে, ঝাড়খন্ডের ৩টি আসনে এবং জম্মু কাশ্মীর ও লাদাখে ১টি করে আসনে ভোট হবে। এই আসনগুলোতে ৬৯৫ জন প্রার্থী প্রতিদ্বন্দ্বিতা করছেন। ২৪ হাজার ৫৭৯টি পোলিং স্টেশনে ভোট গ্রহণ করা হবে।

PM:

প্রধানমন্ত্রী তথা বরিষ্ঠ বিজেপি নেতা নরেন্দ্র মোদী বলেছেন, ২০২৪-এর লোকসভা নির্বাচন দেশের বর্তমান এবং ভবিষ্যৎকে শক্তিশালী করবে। আজ ঝাড়খন্ডের জামশেদপুরে নির্বাচনী সভায় ভাষণ দিতে গিয়ে প্রধানমন্ত্রী বলেন দেশের উন্নয়নে ব্যবসার গুরুত্ব অপরিসীম। কংগ্রেস দেশের ব্যবসাকে শত্রু বলেই মনে করে বলে তিনি জানান। তিনি বলেন যে ব্যবসায়ী এবং বিনিয়োগকারীদের বিরোধিতা করলে কিভাবে যুব সম্প্রদায়ের কর্মসংস্থান হবে।

CM, Dr. Manik Saha:

মুখ্যমন্ত্রী অধ্যাপক ডাক্তার মানিক সাহা আজ লোকসভা নির্বাচনে পশ্চিমবঙ্গের রায়দিঘীতে বিজেপি প্রার্থী সমর্থনে এক নির্বাচনী সমাবেশে প্রধান বক্তা হিসেবে উপস্থিত ছিলেন। এর আগে মুখ্যমন্ত্রী শ্রী সাহা রামগঙ্গায় সংকল্প সভায় ভাষণ দেন। মুখ্যমন্ত্রী নির্বাচনী প্রচারের ফাঁকে দক্ষিণ ২৪ পরগনা জেলার গুরুদাসপুরে ২০০ বছর প্রাচীন পাড়ুইদের লাটে বিশালাক্ষী-শীতলা-মনসা মন্দিরে পূজা দেন।

Bhasha Diwas:

আজ উনিশে মে ১৯৬১ সালের এই দিনে বাংলা ভাষার অধিকার রক্ষার আন্দোলনে শিলচর রেলস্টেশনে পুলিশের গুলিতে শহীদ হন ১১ জন ভাষা আন্দোলনকারী। এই দিনটিকে স্মরণে রেখে ত্রিপুরা পাবলিশার্স গিল্ডের উদ্যোগে আজ কর্নেল চৌমুহনিত্তে স্মৃতিচারণ ও আলোচনা সভা অনুষ্ঠিত হয়। সভায় শহীদদের প্রতি শ্রদ্ধা জানিয়ে, এই দিনটির তাৎপর্য ব্যাখ্যা করেন গিল্ডের সম্পাদক অজিত দেববর্মা, সভাপতি মানষ পাল, বিশিষ্ট সাংবাদিক বিমান ধর তথ্য-সংস্কৃতি দপ্তরের প্রাক্তন অধিকর্তা সুভাষ দাস সহ অন্যান্যরা। এদিকে, অক্ষর পাবলিকেশন এর উদ্যোগে অনুষ্ঠিত হয় আলোচনা সভা কবিতা পাঠ ও শহীদদের স্মৃতিচারণ অনুষ্ঠান। অনুষ্ঠানে আগরতলার কবি সাহিত্যিকরা উপস্থিত ছিলেন।

Matribhasa Suraskha Divas-Dharmanagar:

ধর্মনগরের বিবেকানন্দ সার্থ শতবার্ষিকি ভবনে আলোচনা চক্র এবং কবি সম্মেলনের মধ্য দিয়ে আজ পালিত হলো মাতৃভাষা সুরক্ষা দিবস ২০২৪। তথ্য ও সংস্কৃতি দপ্তর এবং ধর্মনগর পুর পরিষদের যৌথ উদ্যোগে আয়োজিত এই অনুষ্ঠানের সূচনা করেন উত্তর জেলার অতিরিক্ত জেলা শাসক ও সমাহর্তা বিপ্লব দাস। অনুষ্ঠানে অন্যান্যদের মধ্যে উপস্থিত ছিলেন উত্তর জেলার শিক্ষা আধিকারিক সুখময় নাথ, ধর্মনগর সরকারি মহাবিদ্যালয়ের বাংলা বিভাগের অধ্যাপিকা ডঃ নন্দিতা রায়, তথ্য ও সংস্কৃতি দপ্তরের উত্তর জেলার সহকারি অধিকর্তা দিলীপ দেববর্মা প্রমুখ।

Congress :

খোয়াইতে কংগ্রেস দলের আজ এক বর্ধিত সভা অনুষ্ঠিত হয়। বৈঠক উপস্থিত ছিলেন প্রদেশ কংগ্রেস সভাপতি আশীষ কুমার সাহা। তিনি বলেন, কিছুদিন বাদেই রাজ্যে পঞ্চায়েত নির্বাচন অনুষ্ঠিত হতে যাচ্ছে। শাসকদল প্রশাসনকে ব্যবহার করে অনৈতিকভাবে ডিলিমিটেশন করছে বলে তিনি অভিযোগ করেন। এই ব্যাপারে রাজনৈতিক দলগুলিকে কিছু জানানো হয়নি, যা সম্পূর্ণ অনৈতিক বলে তিনি অভিযোগ করেন। বৈঠকে অন্যান্যদের মধ্যে উপস্থিত ছিলেন প্রদেশ মহিলা কংগ্রেসের সভানেত্রী সর্বাণী ঘোষ, প্রদেশ কংগ্রেসের সম্পাদক শব্দ কুমার জমাতিয়া, জেলা কংগ্রেসের সভাপতি প্রদ্যুৎ ভট্টাচার্য সহ অন্যান্যরা।

CPI (M) :

কমিউনিস্ট আন্দোলনের অন্যতম নেতা তথা ভিয়েতনাম বিপ্লবের জনক হো চি মিনের আজ জন্মদিন পালন করা হয় মেলার মাঠ সিপিআইএম রাজ্য দপ্তরে। সেখানে তাঁর প্রতিকৃতিতে পুষ্পার্ঘ্য দিয়ে শ্রদ্ধা জানান সিপিএম রাজ্য সম্পাদক তথা বিরোধী দলনেতা জিতেন্দ্র চৌধুরী। পরে শ্রী

চৌধুরী তাঁর জীবন দর্শন নিয়ে আলোচনা করেন। অনুষ্ঠানে এছাড়া উপস্থিত ছিলেন প্রাক্তন মন্ত্রী রতন ভৌমিক সহ দলের অন্যান্যরা ।

CPIM-2 :

বিলোনিয়ার সিপিআইএম অফিসে এক অনুষ্ঠানের মাধ্যমে আজ হো চি মিনের ১৩৪ তম জন্মদিন পালন করা হয়। অনুষ্ঠানে উপস্থিত ছিলেন বিধায়ক দীপংকর সেন ও অশোক কুমার মিত্র, দলের মহকুমা সম্পাদক তাপস দত্ত প্রমুখ।

A two-day workshop at ICV:

বিলোনিয়ার ঈশ্বরচন্দ্র বিদ্যাসাগর কলেজের অভ্যন্তরীণ গুণমান নিশ্চিতকরণ সেলের উদ্যোগে গভেষনা পদ্ধতি বিষয়ক দু'দিনের কর্মশালা আজ শেষ হয়েছে। গতকাল কর্মশালার উদ্বোধন করেন অধ্যক্ষ ড. মনোরঞ্জন দাস। কর্মশালায় শরীর বিদ্যা, বাংলা বিষয়, অর্থনীতি, উদ্ভিদ বিদ্যা ও প্রাণী বিদ্যা বিষয় সংক্রান্ত আলোচনা হয়। কর্মশালায় ১০০ জন ছাত্রছাত্রী অংশ গ্রহণ করেন।

Blood donation:

লোকনাথ সেবাশ্রম সংস্থার উদ্যোগে আজ আগরতলা লোকনাথ মন্দিরে এক রক্তদান শিবির অনুষ্ঠিত হয় । এই রক্তদান শিবিরে প্রধান অতিথি হিসেবে উপস্থিত ছিলেন আগরতলা পুর নিগমের মেয়র দীপক মজুমদার, কর্পোরেটর রত্না দত্ত সহ অন্যান্যরা। মেয়র রক্তের চাহিদা ও যোগানের মধ্যে সমতা রক্ষা করার জন্য সবাইকে রক্তদানে এগিয়ে আসার আহ্বান জানিয়েছেন।

এদিকে, AIDS কন্ট্রোল সোসাইটি ও স্বাস্থ্য দপ্তর এর উদ্যোগ আগরতলা আইজিএম হাসপাতালে আজ রক্তদান শিবিরের আয়োজন করা হয়। শিবিরে

উপস্থিত ছিলেন মন্ত্রী সান্তনা চাকমা ও স্বাস্থ্য দপ্তরের সচিব কিরণ গীত্তে, স্বাস্থ্য দপ্তরের অধিকর্তা সহ অন্যান্যরা। মন্ত্রী সান্তনা চাকমা ও স্বাস্থ্য দপ্তরের সচিবের সহধর্মিনী শিবিরে রক্তদান করেন।

Sit and draw competition:

রবীন্দ্র জয়ন্তী উপলক্ষ্যে কৃষ্ণনগরের ছাত্র সংঘ সামাজিক সংস্কার উদ্যোগে আজ বসে আকো ও সঙ্গীত প্রতিযোগিতা আয়োজন করা হয়। সকালে বসে আকো প্রতিযোগিতায় উপস্থিত ছিলেন আগরতলা পুর নিগমের মেয়র দীপক মজুমদার সহ অন্যান্যরা। পরে প্রতিযোগিতার বিজয়ীদের মধ্যে পুরস্কার বিতরণ করা হয়।

Summer Theater Workshop:

সংস্কৃতি মন্ত্রণালয় ও NCERT -র সহায়তায় ন্যাশনাল স্কুল অফ ড্রামার থিয়েটার ইন এডুকেশন ত্রিপুরা শাখার উদ্যোগে আজ থেকে সোনামুড়ার নবদ্বীপ চন্দ্র ইনস্টিটিউটউশনে শুরু হয়েছে "সামার থিয়েটার ওয়ার্কশপ"। এই কর্মশালা শেষ হবে আগামী মাসের ৬ তারিখ। সোনামুড়া মহকুমার বিভিন্ন বিদ্যালয় থেকে মোট ৭০ জন ছাত্র-ছাত্রী নাটকের এই কর্মশালায় যোগদান করেছে। ত্রিপুরা ছাড়াও পার্শ্ববর্তী আসাম, পশ্চিমবঙ্গ ও রাজস্থানের প্রশিক্ষকরা কর্মশালায় প্রশিক্ষণ প্রদান করছেন।

National school of drama:

এদিকে, সাব্বরুম দ্বাদশ স্কুলেও আজ থেকে শুরু হয়েছে গ্রীষ্মকালীন শিশুদের থিয়েটার কর্মশালা। এই কর্মশালার সূচনা করেন সাব্বরুম দ্বাদশ স্কুল পরিচালন কমিটির সভাপতি শান্তিপ্রিয় ভৌমিক। সাব্বরুম মহকুমার ৫ টি স্কুলের ৮৫ জন ছাত্র-ছাত্রী অংশ নিয়েছে কর্মশালায় প্রথম দিনে।

TET Teachers :

ত্রিপুরা টেট টিচার্স ওয়েলফেয়ার অ্যাসোসিয়েশনের উদ্যোগে সিবিএসই বোর্ড পরিচালিত মাধ্যমিক এবং উচ্চ মাধ্যমিক পরীক্ষায় আমবাসা মহকুমার ৬০ শতাংশের উপর নম্বর প্রাপক ১০২ জন ছাত্র-ছাত্রীকে আজ সম্বর্ধনা প্রদান করা হয়। কুলাই কলোনী উচ্চ বিদ্যালয়ে আয়োজন করা হয় এই সম্বর্ধনা অনুষ্ঠানের। অনুষ্ঠানের শুভ সূচনা করেন কুলাই দ্বাদশ শ্রেণী বিদ্যালয়ের প্রিন্সিপাল সুশীল দাস। এছাড়াও অন্যান্যদের মধ্যে উপস্থিত ছিলেন সংগঠনের রাজ্য নেতৃত্ব অজয় পাল, মহকুমা স্তরের নেতৃত্ব স্বপন নমঃ সহ অন্যান্যরা।

SFI TSU:

বিদ্যাজ্যোতি স্কুলগুলিতে মাধ্যমিক ও দ্বাদশে নিরাশাজনক ফলাফলের স্পষ্টীকরণ চেয়ে আজ আগরতলায় মিছিল করল বামপন্থী দুই ছাত্র সংগঠন এসএফআই এবং টিএসইউ। এসএফআই এর রাজ্য সম্পাদক সন্দীপন দেব অভিযোগ করেন, স্কুলের নিরাশাজনক ফলাফল নিয়ে সরকারের তরফে কোন বক্তব্য এখনও শোনা যায়নি। তিনি দাবি জানিয়ে বলেন, বিদ্যাজ্যোতি স্কুলগুলিতে বাংলা এবং ইংরেজি মাধ্যমে পড়ুয়াদের নিজ নিজ ভাষায় পরীক্ষার সুযোগ দিতে হবে। এদিনের মিছিলে অন্যান্যদের মধ্যে উপস্থিত ছিলেন ছাত্রনেতা সুলেমান আলি, নেতাজী দেববর্মা, সুজিত ত্রিপুরা সহ অন্যান্যরা।

NIA-Bishalgarh:

NIA আবেদনমূলে মানব ও নারী পাচারের অভিযোগে অভিযুক্ত মোস্ট ওয়ান্টেড হান্নান মিয়া নামের এক ব্যক্তিকে গ্রেপ্তার করেছে বিশলাগড় থানার পুলিশ। আজ ভোররাতে বিশালগড়ের রাস্তার মাথা এলাকা থেকে তাকে গ্রেপ্তার করা হয় বলে জানিয়েছেন বিশালগড় থানার ও.সি রানা চ্যাটার্জী। তার বাড়ি আমতলী থানাধীন মতিনগর এলাকায়। তিনি জানান

২০২৩ সালের NIA গোয়াহাটি শাখায় মানব পাচার সংক্রান্ত একটি মামলা রয়েছে অভিযুক্তের বিরুদ্ধে। তার গ্রেপ্তারির খবরে আজই গোয়াহাটি থেকে NIA -র একটি দল বিশালগড়ে এসেছে। আদালতের ট্রানজিট রিমান্ড নিয়ে অভিযুক্তকে গোয়াহাটি নিয়ে যাবে ওই দলটি।

All Tripura Blind Association:

All Tripura Blind Association-এর বাৎসরিক সভা আজ নরসিংগড়ের সংগঠনের কার্যালয়ে অনুষ্ঠিত হয়। সভায় বাৎসরিক প্রতিবেদন পেশ করেন সংগঠনের সাধারণ সম্পাদক মিঠুন সাহা। এছাড়াও কেন্দ্রীয় ও রাজ্য সরকারের গৃহিত বিভিন্ন প্রকল্প নিয়েও সভায় আলোচনা হয়। সভায় সভাপতিত্ব করেন সংগঠনের সভাপতি সনাতন দেবনাথ।

Khetmajur union:

বিভিন্ন কর্মসূচির মাধ্যমে ত্রিপুরা ক্ষেতমজুর ইউনিয়নের ৪৫তম প্রতিষ্ঠা দিবস আজ পালন করা হয়। আজ সকালে মেলারমাঠে সংগঠনের রাজ্য কার্যালয়ে সংগঠনের পতাকা উত্তোলন করেন ইউনিয়নের রাজ্য সম্পাদক শ্যামল দে। অনুষ্ঠানে উপস্থিত ছিলেন সংগঠনের অন্যান্য নেতৃবৃন্দ ও কর্মীরা।

Accident death:

আগরতলা-খোয়াই জাতীয় সড়কের ভাটি ফটিকছড়ায় গতকাল রাতে এক দুর্ঘটনায় অনুপম দাস নামে একজনের মৃত্যু হয়। পুলিশ জানিয়েছে, গতকাল রাতে ভাটি ফটিকছড়ায় দ্রুতগামী একটি বাইক অনুপম দাসকে ধাক্কা দেয়। গুরুতর আহত অবস্থায় তাকে রাতে জিবি হাসপাতালে ভর্তি করা হয়। চিকিৎসাধীন অবস্থায় মারা যান তিনি। এই ঘটনায় পুলিশ অভিযুক্ত বাইক চালককে আটক করেছে।

Bishalgarh Police:

বিশালগড় থানার পুলিশ ১ কোটি ২০ লক্ষ টাকার ব্রাউন সুগার পাচার মামলায় ফারুক হোসেন নামের আরো এক পাচারকারীকে গ্রেপ্তার করেছে। এই ঘটনায় গ্রেপ্তার হওয়া অপর অভিযুক্তকে জিজ্ঞাসাবাদের পর ফারুক হোসেনকে সোনামুড়া থেকে গ্রেপ্তার করা হয়েছে বলে জানিয়েছেন বিশালগড় থানার ও.সি রানা চ্যাটার্জী।

উল্লেখ্য, গত ১১ তারিখ সন্ধ্যায় নেশা সামগ্রী পাচারকালে পুলিশি অভিযানের সময়ে ফারুক হোসেন পালিয়ে যায়।

Attack of Elephant:

তেলিয়ামুড়া মহকুমার কপালি টিলা গ্রামে গতকাল রাতে বন্য হাতির আক্রমণে এক কৃষকের গবাদি পশুর মৃত্যু হয়। বন্য হাতির আক্রমণের কৃষি ক্ষেতের ধান ও সবজি নষ্ট হচ্ছে বলে জানিয়েছেন স্থানীয় বাসিন্দারা। উল্লেখ্য, বন্য হাতির আক্রমণে ইতিপূর্বে বেশ কয়েকজন মানুষের মৃত্যুও হয়।

Senior Cricket Santirbazar:

শান্তিরবাজার ক্রিকেট এসোসিয়েশন আয়োজিত মহকুমা সিনিয়র ক্রিকেট টুর্নামেন্ট চ্যালেঞ্জার ট্রফির আজকের ম্যাচে গ্রীনআর্থ সোসাইটিকে ৬৯ রানের ব্যবধানে হারাল ব্রু জোয়ান মুথু। বাইখোড়া মাঠে টসে জিতে প্রথমে ব্যাট করতে নেমে বিজয়ী দল ব্রু জোয়ান মুথু ৪৮.৫ ওভারে ৩৯৫ রান করে। দলের দয়ানন্দ নোয়াতিয়া সর্বোচ্চ ১০৩ রান করেন। বৃষ্টির কারণে গ্রীণআর্থ সোসাইটির সামনে ৩২ ওভারে ২৫৪ রানের লক্ষ্যমাত্রা দেওয়া হলেও ২৬ ওভারে ১৮৪ রানে অলআউট হয়ে যায়। বিজয়ী দলের

আলয় দেববর্মা ২ ওভারে ৪ রানে ৩ উইকেট ও উমেশ রিয়াং ৩৭ রানে ৪ উইকেট তুলে নেয়।

Cricket:

ঘরোয়া প্রথম ডিভিশন লিগ ক্রিকেটে আজ অনুষ্ঠিত তিনটি ম্যাচে চলমান সংঘ, পোলস্টার ক্লাব ও ইউনাইটেড বি এস টি জয়লাভ করেছে। এম বি বি স্টেডিয়ামে পোলস্টার ক্লাব ১১৭ রানে বনমালীপুর ক্রিকেট ক্লাবকে, পুলিশ ট্রেনিং একাডেমি মাঠে চলমান সংঘ ১০ রানে মৌচাক ক্লাবকে এবং টি আই টি মাঠে ইউনাইটেড বি এস টি ৪ উইকেটে ওল্ড প্লে সেন্টারকে পরাজিত করে।

Inter School Cricket:

সদরের আন্তঃস্কুল ক্রিকেট প্রতিযোগিতার আজ অনুষ্ঠিত তিনটি খেলায় ভবনস্ ত্রিপুরা বিদ্যামন্দির, হেনরি ডিরোজিও স্কুল ও বিদ্রোহী কবি নজরুল বিদ্যাভবন জয়লাভ করেছে। নরসিংগড়ের পঞ্চায়েত মাঠে অনুষ্ঠিত সকালের খেলায় ভবনস্ ত্রিপুরা বিদ্যামন্দির ৮ উইকেটে আনন্দনগর স্কুলকে এবং একই মাঠে দুপুরের খেলায় হেনরি ডিরোজিও স্কুল ১৬ রানে শ্রীরবি শংকর স্কুলকে পরাজিত করে। অপরদিকে, তালতলা মাঠে সকালের খেলায় বিদ্রোহী কবি নজরুল বিদ্যাভবন ৬ উইকেটে নন্দননগর স্কুলকে হারিয়ে দেয়। বৃষ্টির কারণে এই মাঠে প্রগতি বিদ্যাভবন ও শিক্ষা নিকেতনের দুপুরের খেলাটি বাতিল হয়ে যায়।

Weather:

আজ দক্ষিণ পূর্ব মৌসুমি বায়ু প্রবাহ দক্ষিণ আন্দামান সাগরে স্পর্শ করেছে। এর প্রভাবে আগামী মাসের প্রথম দিকে কেবল ও ত্রিপুরাসহ উত্তর পূর্বাঞ্চলে বর্ষার আগমন ঘটতে পারে।

এদিকে, রাজ্যে পরবর্তী ২৪ ঘন্টার আবহাওয়ার পূর্বাভাসে জানানো হয় আকাশ সাধারণত মেঘলা থাকবে। বজ্র বিদ্যুৎসহ হালকা থেকে মাঝারি ধরনের বৃষ্টি হতে পারে। আজ বিকেল পর্যন্ত আগরতলা ও তার আশে পাশে বৃষ্টি হয়েছে ১৩.৩ মিলিমিটার। উত্তর জেলা, উনকোটি, ও ধলাই জেলায় বিক্ষিপ্ত ভাবে বজ্র বিদ্যুৎসহ বৃষ্টি ও ঘন্টায় ৪০ থেকে ৫০ কিলোমিটার বেগে এবং রাজ্যের বাদবাকী জেলায় ৩০ থেকে ৪০ কিলোমিটার বেগে ঝড়ো হাওয়া বয়ে যাওয়ার সতর্ক বার্তা দেওয়া হয়েছে।
